

Осіннь най нам буде інспірацієв ку активній роботі

Пришла осіннь. Природа ся рихтує на зиму. Дні суть куртшы, ночі довшы, но а нам, школярям і студентам ся уж наповно розбігнув далшый школьскый рік. Час неконечного вольна ся скінчив і приходить реаліта в подобі повніня каждоденных школьских повинностей. Вірю, же сьте ся, діточки, пустили до роботи зо смаком і ентузіазмом.

Літні вакації уж поминули а уж приходять далшы – осінні – у звязі із памятным днём помершых, коли приходиме на цінтері наших міст і сел і споминаме на наших близьких, котрых сьме познали а днесь, на жаль, уж не суть міджі нами.

Но перейдийме із песімістичных думок на даякы кус веселшы. На час літніх вакацій нам зістало много красных споминок і фотографій, зясь сьме може спознали новых приятелів, навщівили сьме даякы интересны місця, або сьме лем так просто вегетили. Я собі особно найрадзе споминам на красну акцію, котра ся каждорічно одбыває в днях 20. – 23. авґуста. Іде о стрічу русиньской молодежи із цілого світа на **День молодого Русина**, котра ся того року одбывала в Сербску, в русиньскім селі Руський Керестур. О тій интересній акції ем уж на сторінках Народных новинок написав свої почуткы і зажиткы, но можу вам із властных скусеностей повісти, же на стрічі русиньской молодежи істо нігда не забуду.

Може і вы через вакації зажали даякы интересны зажиткы. Мате простор в **Русалці** ся ведно з нами о них поділити. Многих бы може интересовало як перебігать ваша година русиньчны, або што ся робить в кружках, до котрых сьте вирішили в тім школьскім році ходити. Може хтось з вас радо пише о природі, звірятках, скавтінгу... І на тоты темы є на сторінках **Русалкы** про вас простор через цілый слідуочій школьскый рік. Редакція ся буде тішыти з творчой активіты каждого із вас, хоцьбы лем у формі куртого стишку, статі або гаданкы. Кому не іде барз добрі писаня статей, може нашу **Русалку** збогатити красными рисунками або фотографіями. Можностей є справды много, лем не треба быти лінивы і штось интересне створити. Ку вашій творчій активності вам жычу велё терпезливості і смаку а у школї много успіхів.

Мґр. Марек ҒАЙ, учитель русиньского языка, ОШ в Радвані над Лабірцём

Окtober – Місяць почливости ку старшым

Так як каждый місяць, і місяць окtober є богатый на вызначны дні, наприклад, у тім місяцю є Світовый день усміву, Світовый день зраку і много далшых. Но не мож забути і не спомянути, же **10. октобра є Міджінародный день старшых людей і сениорів. Може зато ся цілый місяць несе в тім духу – почливости ку старшым.**

Час є неупросный. Своєв невидимостєв, але сталов притомностєв ся поступно вписує до зморщок і сыпле стрібло до волося людей, абы примонянути свою екзистенцію. Реаліту але треба прияти і змірити ся з нєв без жалю. Каждый вік мать свою красу, а прото і осіннь жывота може быти красна. На тім ся але в немалій мірі поділять і справованя ся людей, із котрыма ся стрічає.

Старостливість о старшу ґенерацію і почливість к ній, думам, же была і мала бы быти выслідком вызірлости і культурности каждого народа. Но видить ся мі, же то так цалком не є. Про мене і про далшых наісто ся найде дость часу задумати ся над тым і усвідомити сі, же старшу ґенерацію собі треба уцтити і помагати ей. Старшы уж велё пережили і мають неоцінимы скусености, а тоты скусености давають передусловія молодым, жебы ся ліпше просадили в жывоті.

Думам сі, же в минулости была почливість ку старшым веце проявляна, як в сучасній добі. Молоды бы много веце мали мати в почливости то, што старшы уж зробили, вытворили, а не іщі то нічіти. Молоды люде в сучасности собі думають, же суть може наймудрішы на світі, а не мають ниякы забороны. Родічі їм не жертвують тілько часу, як бы потребовали, мало ведно мало бісідують. Но, може, бы ай хотіли, але настала така доба як настала, же каждый ся даґде понаглять а родічі ся хотять о свої діти добрі постарати. А так лем роблять і роблять, абы їм ніч не хыбило. В тій модерній добі діти виростуть, но много з них скоро забывають, же што вшытко про них родічі зробили, што собі про них і вытерпіли.

Зато почливість ку старшым бы не мала мати лем матеріалный характер, але і духовный розмір. Молоды бы то мали розуміти не як повинність, але як властный вклад, який мать тыж обратный одзвы. Як ся односиме ку старшым мы, то ся нам вшытко верне од властных дітей.

Ярміла МІКОВА, Стацін, студентка 4. річника Педагогічної факулты ПУ

Памятаме вшыткы на своїй помершых предків?!

Руський філозоф Данілевский в природі выділять три етапы: зроджіння, росцвітання і одумераня. Тот колобіг є типичный як і про культуру, цивілізацію, так і про чоловіка. Чоловік ся народить, жыє і умерать. То є закон природы. Смерть належить к жывогу.

На наших помершых споминаме інтензівно в часах святочных – на Пасху, Рождество, в день їх народжіння або в день їх смерти, но главно **1. новембра – на Свято вшыткых святых**. В тот день собі інтензівніше усвідомлюєме, же уж не суть міджі нами. Є барз красно, же люде сі споминають і мають в почливости помершых. Люде мають можность іти на гробы, зробити на них порядок, принести квітки, вінці, запалити свічки і помолити ся за їх души. Наша щіра молитва може помочи к одпущіно кары за їх гріхы. Тото свято є часом, коли на цінтерєх є омного рушніше, а, може, і мы ся задумуєме глубше над своїм жывогом, котрый ся раз помине. Богато прикрашены гробы, запах воску, фарєбне квітя, світло поломіня свічок дотворюють атмосферу бозького покоя, котра є притомна на цінтерєх. Но є на шкоду, же тота красота є лем раз у році. Яке бы то было шумне, кібы сьме сі знали спомянути на наших помершых нелем першого новембра?! Ці собі они не заслужать наш интерес?! Но є лем на нас, ці сі вступиме до свого сумліня і найдемє сі кус часу, жебы сьме зашли на цінтерь.

Тыж не забывайме, же на цінтерєх суть похованы нелем наши найблизшы, котрых сьме особно знали, но і розлічны особыности політичного, культурного, освітного, церьковного і народностного жывота Русинів. Є треба, жебы і їх гробы не зістали пусты, а так дали знати остатнім незаинтересованым, же їх работа не была марна, безвызнамна. Істо бы наши крокы не вели по такій дорозі, яков ідеме днеська, а то і їх заслуга. Зато їм належить наша вдяка. В дакотрых церьквах ся стрічає з піснєв *На душічкы*, в котрій суть глубоки думкы і духовный вызнам того свята:

„На душічкы памятайме, а за них ся умоляйме, будуть на нас памятати, кідь будеме умерати. На свою смерть памятайме, і за ню ся умоляйме, хто ся за ню умоляє, добров смертєв умерас.“

Марія СМЕТАНОВА, Міджілабірці, студентка 4. річника Філозофічної факулты ПУ

Люблю свою родину

Люблю свою родину і вшыткых, котры ку ній належать. Не роблю міджі нима ниякы розділы ани розброї. Никого не люблю веце або менше. Думам, же каждый любить своїй близьких і наперек тому, же даколи ся може міджі собов поवादять, но знають собі взаємно одпущати і тримати ведно і надале. Я сама так роблю, бо з цілого сердця люблю свою мамку, нянька, бабы, діда, теты, вуйків, братранців і сестреніці. Познам людей, котры твердят, же свою родину не люблять. Многы так говорять тыж із „фраеринь“. Можуть собі повідати, же свою родину не люблять, но я їм не вірю, бо знам, же в їх сердці є то цілком іншак...

Діана ШУТІЄВА, ОШ у Радвані над Лабірцём

Світелко помочи про малых онкологічных пацієнтів

Каждым роком прибыває чісло онкологічных пацієнтів нелем з рядів дорослых, але хворіють і малы діти. Бой із тов хворотов є довгый і комплікований, погляд на терпіння хворых діточок – страшный. Родины, котрых постигла така траґедія, перешли властным пеклом і поучінєм, же в таких ситуаціях є потребна нелем медіцинська, але главно матеріална, а в непосліднім ряді і людська поміч.

Зродила ся думка заложити фонд на поміч терпячим дітєм і їх родинам, котрый бы мав помочи фінанчно, але і матеріално – формов швелиякых потреб, котры допоможуть при лічіню пацієнта. **Неінвестичный фонд СВІТЕЛКО ПОМОЧИ взникнув 23. 8. 2006 в Кошыцях** і вызыває вшыткых, котры хотять помочи, або самы поміч потребуєть, наконтактовати ся на вебову сторінку: www.svetielkopomoci.sk, або на мейлової адресі: svetielkopomoci@svetielkopomoci.sk, припадно на чіслі телефону 0903 821 676.

-р-

Успішний конкурз Співы мого роду і ёго принос...

Пестованя любви к русиньскій народній співанці у нашей молодой ґенерації і главно звышений интерес молодежи о ей інтерпретацію в посліднім часі є на потіху тым, котры ся занимають фолклором і музичнов культуров Русинів.

Потвердив то і недавно скінченый **5. річник** конкурзу в інтерпретації русиньских народных співанок під назвов **Співы мого роду**, котрый ся завершыв **30. септембра 2006 у Міджілабірцях**. Ёго організатором была **Русиньска оброда на Словенську з центром у Пряшові** в сполупраці з окресными і містными організаціями РОС. Фіналному вечору передходили містны і окресны выберовы кола, в котрых взяло участь выше 200 співаків у категоріях дітей, молодежи і дорослых. Лавреатами конкурзу ся стали: **Мартін Караш і Івана Сивулякова з Камюнкы**, Старолюбовняньского окресу.

Як ся высловив член выконного выбору Русиньской оброды і председа пороты фіналового вечора – **Штефан Зима**, „звышуючий ся тренд интересу молодых співаків і участь в конкурзі Співы мого роду, як і ведно звышованя якості співу і інтерпретаторьского прояву в области народного співу, главно русиньского, може нас лем тішыти Гляданя талантів путєв таких конкурзіе треба підпоровати і дале розвивати.“ (Позн. А. З.: Протів тому не мож ніч мати, лем то привітати і тішыти ся з того. Але многих интересує то, накілько такы конкурзы проглублюють у підрастаючого покоління, але і у дорослых їх русиньску свідомость, гордость на русиньску культуру і фолклор, і ці мать то даякый вплив на то, жебы такы конкурзы мотивовали русиньскы діти к интересу о навчаня предмету русиньскый язык і культура?! Напр. в Старолюбовняньскім окресі?)

Як увели представителі Русиньской оброды на Словенську, на проектї далшого, шестого річника того конкурзу ся зачне робити уж в новембрі 2006.

Петро КРАЙНЯК, Пряшів

• В рамках 4. Світового табора русиньской молодежи 20. – 23. авґуста 2006 у Сербьску ей участниця навщівили і Філозофічну факулту Новосадьской універзіты, де были прияты главно на катедрі русиньского языка і котрых спроводжав ей працюєник – проф. Др. Михал Фейса (сидячий).



